

La libertad da la pressa ed ils dretgs dals consuments

Vincent Augustin, il nov president da l'UBI

DA LUCAS DEPLAZES / ANR

■ **Consuments da medias che sa sentan offendids u discriminads pon far recurs a l'instanza independenta da recurs da radio e televisiun (UBI). Quella è vegnida fundada avant 30 onns dal cussegl federal. Part da quella istanza fan nov commembers or da las quatter regiuns linguisticas.** Roger Blum, il president partent da l'UBI, ha publictà il proceder ed ina part da las sentenzias da l'istituziun en in cudesch «Unseriöser Journalismus?» Roger Blum, il professor emerit da l'Universitad da Berna, fa attent al svilup tecnic sfrenà cun sia globalisaziun sin il sector da la telecommunicaziun sco: google, facebook, youtube, amazon u twitter che na lubeschian betg ina intervenziun da l'UBI. E tuttina è el persvas ch'i dordia ina tscherca regulaziun tar las medias en Svizra. Il «Wilder Westen» sin l'internet na possia betg dispensar nus da procurar per in meglier urden en il sector da radio e televisiun. Il radio è anc adina il medium ch'il public taidla il pli ditg ed il pli savens. En Svizra cuntanscha la televisiun in milliun spectateurs. Quai na dastga betg esser il cas ch'ina redacziun mainia in milliun persunas sin ina via fallada, ha accentuà Blum en la conferenza da medias a Berna. Las medias han oz ina gronda pussanza ed influenza sin ils consuments. Ellas possedan era la pussaivladad da selecziunar lur novitads en il senn negativ u unilateral, quai vul dir manipular l'infurmaziun. Quai è era stà il motiv da



Roger Blum (a san.), il president partent da l'UBI ed il nov parsura Vincent Augustin.

FOTO L. DEPLAZES

crear ina istanza independenta da recurs per radio e televisiun gia avant 30 onns.

Ina buna pressa

Da l'onn 2008 fin 2015 ha l'UBI tractà 150 intervenziuns dal public, quai che munta 20 fin 25 reclamaziuns l'onn.

L'UBI metta gronda paisa sin in proceder transparent, perquai èn las discussiuns per ordinari publicas. Per Blum è il dumber da las reclamaziuns dals auditors e dals aspecturs in indicatur che laschia trair tschertas conclusiuns davart la qualidad e la seriusadad da noss schurnalis-

sem. Or da quest puntg da vista meritia nossa pressa ina giudicaziun positiva.

Da caracter pedagogic

Vincent Augustin, il nov president da l'UBI, ha punctuà che l'instanza da recurs saja oz en buna furma e diponia da

blera experientscha sin il sector da radio e televisiun. Ins la possia cumparegliar sco emprima istanza da recurs cumparabla al tribunal administrativ federal a S. Gagl. Cunter sias decisiuns pon ins appellar al tribunal federal. Las decisiuns da l'UBI na sajan betg spectacularas, ha manegià Augustin. Ellas èn da caracter pedagogic e duain procurar per ina infurmaziun conform als fatgs e respectar la libertad da las medias, ha punctuà Augustin. Cun la nova lescha davart radio e televisiun ha l'UBI er l'incumbensa da surveglianza sin ils ulteriurs secturs publicistics da la SRG, numnadain il sector online.

Nua pon ins reclamar?

Ils consuments da radio e televisiun pon reclamar tar il mediatuor da la SRG (Ombudstelle) *Achille Casanova*, Berna u s'adressar a l'instanza independenta da recurs per radio e televisiun (UBI). Quell'instanza tracta era reclamaziuns dals emetturs privats da radio e televisiun. Tgi che ha problems davart contribuziuns en la pressa po s'adressar al «Cussegl svizzer da la da pressa». Tgi che n'è betg satisfatg da la giudicaziun da l'UBI ha anc la pussaivladad da far recurs al tribunal federal a Losanna. Il proceder da l'UBI è gratuit per il recurrent.